



# ISLA ONLINE

Noticia Transparente di Gobierno

Diabierna 2 December 2022


Email: [IslaOnline@gobierno.aw](mailto:IslaOnline@gobierno.aw) Tel: 528-4952

BON PASCO  
FELIZ 2023



Gabinete Wever - Croes II





## PROME MINISTER Y MINISTER DI FINANSA A REUNI CU VICE PRESIDENT DI RAAD VAN STATE, SEÑOR THOM DE GRAAF

Diahuebs ultimo, siguiendo reunionnan na Hulanda riba e tema financiero di Aruba, Prome Minister Evelyn Wever-Croes y Minister di Finansa Xiomara Maduro a reuni cu vice president di Raad van State, señor Thom de Graaf. Anteriormente señor de Graaf tawata miembro di Parlamento na Hulanda y semper e tawata tin un luga special den su curason pa Aruba. Raad van State ta e instituto cu ta duna Gobierno di Hulanda conseho ora cu tin mester entre otro riba leyman di Reino (Rijkswet).



Esaki no ta e prome biaha cu e mandatarionan di Aruba a reuni cu señor de Graaf. Anteriormente a reuni cu señor de Graaf riba e leyman di Reino y tambe recientemente Raad van State a duna conseho riba COHO y Raft. E consehonan aki ta conoci y publica. Temanan cu un biaha mas a bin dilanti den e reunion di e siman aki.

Principalmente, Raad van State ta un di e institutonan na Hulanda cu ta para hopi firme pa lora ta relacionnan den Reino, tanto relacionnan huridico, constitucional como den e parti financiero.

Prome Minister a expresa cu ta importante pa haya sa con Raad van State ta mira e situacion financiero di Aruba. Pa e motibo ey tambe e mandatarionan a comparti informacion ya cu Raad van State tin cu duna conseho riba cierto di e leyman. E mandatarionan a splica con e situacion di Aruba ta. Especificamente cu Presupuesto 2023 a pasa y cu un surplus.

“Riba esakinan Gobierno di Aruba a haya hopi elogio. Di



nan parti mes tambe nan ta realisa cu nos tin un minister di finanzas hopi relaha despues di a pasa presupuesto cu un surplus. Algo cu ainda Hulanda no a logra. Nos tawata tin un bon reunion cu hopi informacion brinda y consehonan ricibi. Mi ta considera esaki e base di un bon relacion den Reino entre Aruba y Hulanda”, Prome Minister Evelyn Wever-Croes a duna di conoce.



# **Prome Minister Evelyn Wever - Croes:**

## **A REUNI CU VERENIGING VAN NEDERLANDSE GEMEENTE PA EXPLORA OPORTUNIDADNAN PA TRAHA HUNTO**



Recientemente Prome Minister Evelyn Wever - Croes y Minister di Finansa Xiomara Maduro, a reuni cu Burgemeester di Den Haag sr. Jan van Zanen kende tambe ta presidente di Vereniging van Nederlandse Gemeente (VNG). Meta di e reunion tabata pa sondea posibilidadnan pa traha hunto.

Prome Minister Wever - Croes a expresa cu e reunion cu tabatin cu Burgemeester van Zanen tabata hopi positivo y unda cu a ricibi un caluroso bon bini. Durante di e reunion a explora con por traha hunto cu e diferente municipionan y con nan por yuda Aruba riba diferente tereno. Algun di e temanan cu a trata ta digitalisacion di gobierno/ E-government, situacion financiero, y integridad.

Por ultimo, Prome Minister Wever - Croes a bisa cu VNG y Burgemeester di Den Haag a indica cu nan ta dispuesto pa yuda Aruba y asina hunto lo por logra hopi cos importante. Burgemeester van Zanen a muestra cu e realmente tin un lugar special pa Aruba den su curason, y el a duna elogio pa e forma con ta gobernando y con gobierno ta hibando Aruba dilanti.



# ARUBA Y HULANDA LO ORGANISA UN CONFERENCIA DI CLIMA OTRO AÑA CU LO TUMA LUGA NA ARUBA

Prome Minister Evelyn Wever - Croes conhuntamente cu Minister Xiomara Maduro, Minister Geoffrey Wever y Minister Glenbert Croes, a reuni cu Minister encarga cu clima na Hulanda, Minister Rob Jetten. Durante di e reunion a trata e tema di un conferencia di clima den Caribe cu lo wordo organisa otro aña maart na Aruba.

Prome Minister Wever - Croes kende a tuma e iniciativa pa organisa e conferencia, a splica cu desde cu a drenta den gobernacion Minister Glenbert Croes a cuminsa traha riba dje y aworaki ta contento cu por anuncia cu na maart lo organisa un 'Caribbean climate conference'. Pronto Prome Minister conhuntamente cu Minister Jetten lo bay extende e invitacionnan.

Meta di e conferencia aki ta pa concentra riba e apectonan di clima den reino reconociendo cu cada pais den Reino y den region ta haciendo hopi riba e tereno di clima y energia. E ta hopi importante pa sa kico otro paisnan ta haciendo y pa traha hunto pasobra como paisnan cu economianan relativamente chikito, no por carga proyectonan grandi riba nos mes.

Prome Minister Wever - Croes a sigui splica cu Aruba tin e energy policy, cu ta defini e rumbo cu kier hiba maneho di energia, pa cual ta importante pa alinea esaki cu otro paisnan den region. Hulanda ta dispuesto pa busca fondo pa inverti den esaki.

Pa conclui, Prome Minister a expresa cu relacisacion di e conferencia aki, ta resultado di algun luna di trabou duro di Minister Glenbert Croes, pa cual ta contento cu e ta birando realidad otro aña. Minsiter Jetten a duna hopi compliment pa e forma con gobierno ta manehando e pais riba tereno di finansa publico y ta contento di mira e progresonan cu a haci y cu tin finansa na ordo. Esaki ta pone cu Aruba ta gosa di hopi respet y admiracion na Hulanda, Premier Wever - Croes a termina bisando.





## **Prome Minister Evelyn Wever-Croes:**

# **PROME MINISTER TA FELICITA SEÑORA MAYBELINE ARENDS-CROES CU PREMIO CRIOYO DI ORO**



Diaranson ultimo den Cas di Cultura, Maybeline Arends-Croes a wordo reconoci cu e premio Crioyo di Oro. Un reconocimiento di gradicimento pa tur loke Juffrouw Maybeline a haci pa nos cultura. Prome Minister desde Hulanda via un video cu a wordo pasa e anochi ameno aki, a manda palabranan di felicitacion y gradicimento na Maybeline Arends-Croes expresando:

“Mi kier felicita Juffrouw Maybeline pa tur e bunita logronan durante e trayecto di bo bida den e mundo di cultura na Aruba. Y mi ta gradici bo pa tur loke bo a haci y significa pa nos cultura. Mi a conoce Juffrouw Maybeline desde cu mi tawata bay Colegio Arubano. Y Juffrouw Maybeline a inspira mi hopi pa gusta y aprecia musica.

Maybeline tawata tin un carera politico. Y como hende muhe den politica tambe a haci un impacto hopi grandi riba mi persona. Y asina Maybeline a inspira hopi mucha, hoben y adulto den su trayectoria. Cu Dios bendiciona bo y cu bo por goza di e bunita reconocimiento aki y cu bo por sigui deleita nos cu bo talentonan cu Dios a duna bo”.

Prome Minister ta gradici tur esnan cu a haci e evento di reconocimiento aki pa señora Maybeline Arends-Croes posibel. Danki na Go Cultura Fundacion pa honra y reconoce señora Maybeline Arends-Croes cu e premio Crioyo di Oro.





## MINISTER DI FINANSA Y CULTURA MADURO TA FELICITA SR. ADY THIJSEN CU SU RESPONSABILIDAD NOBO COMO ARUBA SU MINISTER PLENIPOTENCIARIO NA HULANDA



Recientemente Ady Thijsen a huramenta como Minister Plenipotenciario pa Pais Aruba. Sr. Juan Thijsen, miho conoci como Ady ta un politico versa cu tin un historia largo den politica na Aruba. Prome di a drenta politica, Ady tabata eherce e funcion di abogado y cu un conocimiento sigur pa locual ta nos Constitucion den Reino.

Ady ta un persona cu semper ta activo pa Aruba desde cu e tabata estudiante na Hulanda. Awo Ady tin un reto nobo representando nos Pais como Minister Plenipotenciario na Hulanda. Minister di Finansa y Cultura Xiomara Maduro ta desea nos Minister Plenipotenciario nobo tur clase di exito den su responsabilidad nobo y danki pa representa nos Pais Aruba dignamente.





**Minister Maduro durante e reunion cu Secretario di Estado Van Huffelen:**

# **A ELABORA RIBA E TRABOUNAN CU ARUBA TA HACI PA CONSERVA, DOCUMENTA Y HACI NOS HISTORIA Y HERENCIA CULTURAL MAS ACCESIBEL PA NOS COMUNIDAD**

Durante su bishita di trabou na Hulanda Minister Maduro acompaña pa Minister President Wever-Croes a reuni tambe cu Secretario di Estado sra. Van Huffelen. Banda di e topico financiero, a toca a parti cultural specialmente pa locual ta trata e trabounan haci na Aruba pa no solamente conserva nos documentacion cu tin di haber cu nos historia, pero tambe haci nos herencia cultural mas accesibel pa comunidad.

Secretario di Estado Sra. Van Huffelen tabata recientemente na Aruba y a bishita nos Archivo Nacional di Aruba y su persona a tuma nota di e avancen riba e parti di digitalisacion hunto cu e parti di nos Biblioteca Nacional kende a bin ta haciendo un trabou pionero pa locual ta digitalisacion y haci esaki accesibel na un publico grandi.

Durante e reunion cu Minister Maduro y Minister President Wever-Croes e mandatario Hulandes a trece dilanti cu e ta bou di e bon impresion pa locual ta trabounan cu ta wordo haci y ta contento di mira cu Aruba a haya e presidencia di MOWLAC, cu ta e programa di UNESCO di Memory of the World Latin America and Caribbean. Nos Pais Aruba ta riba e stoel di presidencia y ta compartiendo cu e region tur e avancen cu nos tin riba e parti pa haya documenta y tambe conserva e documentacion di nos herencia cultural y haci esaki accesibel pa medio di digitalisacion. E mandatario Hulandes a keda masha contento cu e reunion y e trabaonan cu ta wordo haci pa Aruba.






# MINISTER DI FINANSA XIOMARA MADURO A REUNI CU E COMISION DI RELACION DI REINO DI EERSTE KAMER PA BRINDA NAN INFORMACION FINANCIERO DI ARUBA

Durante su bishita di trabao na Hulanda, Minister di Finansa Xiomara Maduro hunto Minister President a reuni tambe cu e Comision Fiho di Relacion di Reino di Eerste Kamer. E Comision cu ta presidi pa sr. Paul Rosenmöller tabata tin diferente pregunta y por a nota cu e Senadornan Hulandes ta hopi interesa pa haya informacion riba varios otro topico di bienestar di nos Pais.

Di parti Aruba a brinda un bista financiero di Pais Aruba y a papia riba e pago bek di e debe cu Aruba a traha cu Hulanda pa surpasa e pandemia. E Senadornan Hulandes a keda satisfecho cu e splicacion amplio cu nan a haya di e delegacion di Aruba su mandatarionan y expertonan. Nan a expresa tambe di ta contento di mira tur esfuerso cu ta wordo haci pa hiba Aruba riba e bon caminda financiero.







## MINISTER ENDY CROES TA FELICITA FUNDACION PARLAMENTO HUBENIL CU NAN PROME DEBATE

**Tema di e aña aki tabata inclusion pa tur mucha**

En conexcion cu Dia Mundial di Derechonan di Mucha, Fundacion Parlamento Hubenil Aruba (FPHA) a organisa nan prome “Debate & Speaking Championship 2022”. Meta di e debate ta pa brinda e hobennan na Aruba un plataforma unda nan por practica nan habilidad pa debati y presenta dilanti un publico. Minister Endy Croes a indica cu ta importante pa crea ciudadanonan activo, involucra y critico pa cu desaroyonan di pais Aruba como tambe desaroyonan mundial.

Un total di 11 hoben a participa den e categoria di debate y/of speech. Tema di e aña aki tabata enfoca riba inclusion pa tur mucha, e hobennan por a debati y presenta nan speech riba e tema aki. Minister Endy Croes tabata presente e atardi aki hunto cu colega Minister Rocco Tjon y Parlamentario Shailiny Tromp – Lee, Setty Christiaans – Yarzagaray y Ricky Hoek.



Mandatardio di Enseñansa ta manda palabra di pabien na tur e hobennan cu a participa y a tuma e curashi pa para dilanti un publico y expresa nan pensamiento critico y opinion. Como tambe ta manda palabra di pabien na directiva completo di FPHA cu e exitoso debate alabes ta gradici FPHA cu ta aportando na desaroyo di futuro lidernan di nos pais.





# MINISTER ENDY CROES Y MINISTER EVELYN WEVER – CROES A REUNI CU KONINKLIJKE KENTALIS Y FEPOH

Recientemente Minister Endy Croes hunto cu Prome Minister Evelyn Wever – Croes a bishita FEPOH pa un encuentro informativo, unda a reuni cu directiva di FEPOH y cu representantenan di Koninklijke Kentalis di Hulanda den cuadro di e desaroyonan pa loke ta intervencion tempran di cuido na muchanan 0-4 aña. Como tambe cuido educativo na muchanan sordo (slechthorend) of cu un trastorno den desaroyo di idioma (taalontwikkelingsstoornis).

Koninklijke Kentalis tabata na Aruba den luna di november unda a duna e ekipo di FEPOH un tayer di specialisacion pa muchanan cu tin problema di habla. Mandatarionan y conseheronan haya informacion y presentacion di e proyecto di conscientisacion unda a duna un demostracion di con dificil e ta ora bo no por expresa bo mes facilmente door di problema di oido of cu habla dor di problema di oido. Koninklijke Kentalis a duna splicacion amplio di con nan ta duna les na muchanan cu tin e problema di habla. Minister Endy Croes ta gradici FEPOH pa tur loke nan ta haci pe muchanan di Aruba.





**Minister Endy Croes:**


# **CEDEMENTO DI LUZ Y RE-APERTURA DI CAYA G.F. BETICO CROES PA AUTOMOBILISTANAN PA TEMPORADA DI FIN DI AÑA**

Prome di december, drentando den e atmosfera di fin di aña, Minister Endy Croes a presencia e Ceremonia di Cendemento di Luz den Caya G.F. Betico Croes. Manera cu Prome Minister Evelyn Wever-Croes a indica, cu lo habri Caya G.F. Betico Croes pa asina dun'e bida y encurasha pueblo pa sostene nos comerciantenan local.

Vice-Prome Minister Ursell Arends acompaña pa su esposa y comerciantenan tambe tabata presente y den careda di 6or di atardi a cende e luznan den Caya G.F. Betico Croes. Di e forma aki a habri Caya G.F. Betico Croes pa tur automobilista pa e temporada aki di fiesta y asina nos sostene nos comercio local.







Tur final di aña ta indica un comienso nobo.  
Nos ta keda gradici cu den aña 2022,  
nos a lanta cabes y mira recuperacion, cu  
esfuerzo di cada ciudadano.

*Glenbert Croes* <sup>MINISTER</sup>

## MINISTER CROES TA FELICITA ADY THIJSEN CU PRESENTACION OFICIAL DI SU PERSONA COMO MINISTER PLENIPOTENCIARIO Y REPRESENTANTE DI UNION EUROPEO NA HULANDA

Diaranson anochi a tuma luga un evento na Den Haag na unda Gobierno di Aruba a presentaseñorAdyThijsenoficialmente como Minister Plenipotenciario y representante di Aruba na Union Europeo na Hulanda. Minister di Labor, Energia y Integracion Glenbert Croes tabata tin e honor di ta presente na e evento aki. Minister Croes a expresa cu pa su persona esaki sigur ta un coronacion di señor Ady Thijsen su carera como politico, pero tambe un coronacion pa e prestigioso partido di Movimiento Electoral di Pueblo (MEP), cu tabata e vehiculo via cual señor Ady Thijsen a sirbi pais Aruba den diferente posicion durante añanan.

Minister Croes tambe a indica cu pa Aruba, un representante na Europa ta importante, mirando cu despues di e pandemia, Aruba mester di cooperacion di Hulanda riba diferente tema. Mirando e desaroyo energetico na Aruba, lo ta di gran beneficio pa Aruba por conta riba apoyo di Hulanda pa cu esaki. Minister Croes a indica cu e conoce señor Ady Thijsen como un luchador cu determinacion y vision y tin tur confianza cu e lo logra habri portanan na Hulanda pa interesnan di pais Aruba.

Pa loke ta trata e Arubianonan cu ta biba na Hulanda y e studentenan, Minister Croes a expresa cu nan tin un gran defensor den señor Thijsen y como Minister di Labor lo percura pa mantene un bon relacion cu Arubahuis pa asina por trece e studentenan yiu di tera profesional bek Aruba pa traha den e mercado laboral. Lo mira e posibilidad pa crea un sorto di job



bank na unda ta haci “job matching” entre studentenan na

Hulanda via Arubahuis pa nan yega Aruba y haya un bon trabou y cu ta paganan bon.

Por ultimo, Minister Croes a indica cu e presentacion di señor Ady Thijsen na e comunidad diplomatico na Den Haag como representante oficial di Aruba na Hulanda, ta un momento pa celebra. Pa años largo señor Thijsen a traha duro, lucha y defende interes di pais Aruba. Minister Croes ta felicita señor Thijsen cu e presentacion oficial aki y ta sigur cu comunidad di Aruba por ta tranquil cu tin un yiu di tera defendiendo interes di pais Aruba na Hulanda.



**Minister Glenbert Croes:**

# **MINISTER DI ENERGIA A REUNI CU PORT OF ROTTERDAM RIBA E TEMA DI INDUSTRIA HIDROGENO**

Durante nan bishita di trabou na Hulanda, Minister di Energia Glenbert Croes hunto cu Minister di Economia Geoffrey Wever a reuni cu Port of Rotterdam riba e tema di inversion den e industria hidrogeno. E reunion aki ta importante pa gobierno mirando cu Aruba ta den e proceso di transicion energetico y tin como meta pa stop e uzo di “fossil fuel” y bin cu un forma di energia cu lo crea un medio ambiente sano pa Aruba su futuro generacion.

Minister Croes a indica cu gobierno di Aruba tin un vision energetico, pero pa por logra realisa e vision aki, Aruba mester e apoyo di su companianan estatal y di empresanan internacional cu un credibilidad halto. Port of Rotterdam, como empresa grandi internacional lo ta di gran apoyo pa pais Aruba.

Tambe, Minister Croes y Minister Wever lo reuni cu Minister Rob Jetten cu ta e Minister di Clima y Energia na Hulanda y cu ta dispuesto pa yuda Aruba den e proceso aki.

E meta di e reunionnan aki ta pa sigui cu e proceso di conscientisacion den Reino Hulandes pa loke ta trata e transicion energetico pa preservacion di e medio ambiente, clima y di e planeta pa nos futuro generacionnan.

Aruba ta un isla chikito den Caribe, pero ta importante pa vocifera y crea conscientisacion pa cu e tema aki, mirando cu si no atende cu cambio climatico, lama por subi y e islanan ta e promenan cu lo desaparece. Minister Croes a expresa cu Aruba ta den un bon rumbo liderisando e proceso y pa duna un bon ehempel na otro paisnan di e caminda cu nos ta canando. Minister Croes tambe ta spera cu Aruba lo ta un inspiracion pa otronan sigui e mesun pasonan. E ta importante pa e paisnan grandi den Reino cana e caminda aki tambe pa asina por brinda un bon ehempel na mundo henter.





# EXITOSO RECEPCION DI INTRODUCCION DI MR. ADY THIJSSEN COMO MINISTER PLENIPOTENCIARIO

Na Marriott hotel a tuma lugar un recepcion di Gobierno di Aruba pa oficialmente introduci mr. Juan (Ady) Thijsen como Minister Plenipotenciario di Aruba na Hulanda. Un recepcion bon atendi pa invitadonan for di e mundo politico, diplomatico y comerciante di Hulanda. Entre e invitadonan cu personalmente a bin felicita sr. Thijsen cu su nombracion tabata Minister di Enseñansa di Hulanda Robbert Dijkgraaf, Prome Minister di St. Maarten Silveria Jacobs, Minister Plenipotenciario di St. Maarten Rene Violenus, miembronan di Tweede Kamer Jan Klink y Jorien Wuite, miembro di Eerste Kamer Toine Beukering. For di cuerpo diplomatico tabata presente embahador di Merca Razdan Duggal, di Uruguay Álvaro Enrique González Otero, di Surinam Rajendre Khargi, di Ecuador Andres Horacio Teran Parral, di Panama Elizabeth Ward Neiman, di Filipinas mr. Jose Eduardo III Malaya, di Kazakhstan Askar Zhumagaliyev. Otro embahadanan manera Peru, Brazil, Suecia, Suiza y Sur Afrika a keda representa pa un embahador suplente.

Tambe e recepcion a conta cu presencia di presidente di MKB Nederland Jacco Vonhoff, prof Gerhard Hoogers di Universidad di Groningen, functionarionan di Hogescholen, ministerio di BZK, Curaçaohuis, St. Maartenhuis, organisacionnan manera Splika y Genootschap Nederland Aruba.

E parti oficial a cuminsa cu un discurso di Prome Minister mr. Evelyn Wever-Croes como introduccion di sr. Ady Thijsen como Minister Plenipotenciario. Sra. Wever -Croes a para keto na e recuperacion di Aruba despues di e pandemia. 'Aruba ta un di e paisnan den Caribe cu a recupera hopi liher di e pandemia. Turismo na ta un nivel di 97 por ciento compara cu prome cu e pandemia y e porcentahe aki tambe ta conta pa nos GDP. Meta ta pa yega otro aña na un surplus di e nivel prome cu e pandemia,' segun Prome Minister Wever-Croes.

E mandatario a sigi bisa cu e prioridad pa e siguiente añanan ta diversifica economia di Aruba, atencion pa adaptacion di clima y transicion di energia. Tambe lo bin cu inversionnan entre otro den enseñansa y salubridad publico. Prome Minister Wever-Croes a bisa di ta contento cu sr. Ady Thijsen a acepta e encargo di Minister Plenipotenciario y alabez Representante di Aruba na Union Europeo y cu e ta convenci cu Sr. Ady Thijsen lo ta un digno representante di Aruba cu lo traha na fortifica e lasonan den Reino, cu Hulanda y cu e comunidad Arubiano na Hulanda.



Despues di un video di introduccion a yega e momento pa sr. Ady Thijsen mes tene su discurso na e invitadonan. Ela cuminsa na describi su lasonan cu Arubahuis desde cu e tabata estudiante na Tilburg y como presidente di CUNA. Como miembro di Staten y despues Presidente di Staten e tabata hopi na Hulanda pa reunionnan di IPKO y asina a reanuda su contactonan cu Arubahuis. Minister Thijsen a bisa cu su vision pa proximo añanan ta pa haci Aruba mas visibel na Hulanda. 'Den esaki Arubahuis ta hunga un rol cardinal. Nos mester fortifica nos relacion cu Gobierno di Reino. Gobierno di Hulanda, ministerionan, Eerste y Tweede Kamer, pero tambe cu gemeente y provincianan. Ta importante pa intensiva nos relacion cu institutonan manera Raad van State, Controleria General, Nationale Ombudsman y SER, mescos cu ta e caso cu instancianan manera VNG, OCA, VNO/NCW, MKB Nederland y RVO pa lora ta e parti comercial. Cu embahadanan lo mester mira unda por bin cooperacion pa desaroyonan economico pa Aruba,' asina minister Thijsen a bisa.



## Continuacion EXITOSO RECEPCION DI INTRODUCCION DI MR. ADY THIJSSEN....



E mandatario a menciona cu ela retene e funcion di representante di Aruba na Union Europeo banda di esun di Minister Plenipotenciario. 'Pa logra nos metanan pa cu Union Europeo ta sumamente importante nos miembrecia di OCAN (Overseas Countries and Territories Association). Ultimo mi a atende un foro di OCAN na New Caledonian na unda bo ta mira cu aunke e islanan den Caribe y esnan den Pacifico, geograficamente ta hopi leu for di otro, pero cu nos por traha hunto riba terenonan mutuo, manera cambio di clima, biodiversidad y seguridad di alimentacion.'

Sr. Thijsen a bisa cu e guerra Oekraina a mostra cu nos mester di otro y cu mester sostene otro. 'Mas cu nunca tin nesecidad na un Reino basa riba union. Nos mester duna mas contenido na unidad, solidaridad, igualdad, husto, responsabilidad y integridad den Reino Hulandes. Pesey semper mi ta di opinion cu articulo 43 lid 1 di Statuut ta e lid mas importante. Si nos como pais den Reino zorg cu derechonan humano fundamental, libertad, derecho di ley y bon gobernacion ta wordo realisa, semper cos lo bai bon,' segun sr. Thijsen.

Den su discurso minister Thijsen a para keto na e ley riba e geschillenregeling cu desde 12 aña pasa cu e amienda Wever/Thijsen a keda acepta pa un mayoria grandi den Tweede Kamer, ainda nada a pasa riba e tereno aki. Thijsen: 'E amienda aki ta bisa cu articulo 12a di Statuut lo mester wordo cambia unda ta stipula cu mester crea facilidadnan den caso cu tin un disputo. Na 2015 e mocion Van Laar a wordo acepta pa Tweede Kamer cu ta bisa hopi cla cu mester bin un "rijkswet geschillenregeling" cu ta stipula pa bin cu un instancia independiente cu ta duna conseho obligatorio den caso di un disputa huridico. Awor aki a yega e momento pa nos bin cu un "rijkswet geschillenregeling". Tambe mi ta boga pa bin un Conferencia di Mesa Rondo di Reino pa trata diferente asunto y interes mutuo cu ta existi entre e paisnan den Reino.'

'Mi ta un gran simpatisante di un Reino fuerte, unda no unicamente ta traha y biba hunto, pero principalmente conhunto carga e responsabilidad y tuma desicionnan conhuntamente. Pesey mi tin tur confiansa den nos Prome Minister Evelyn Wever-Croes y Secretario di Estado pa Asuntonan di Reino



Alexandra van Huffelen, cu tin e interes di e islanan na pecho. Tambe e ta habri pa duna espacio pa yega na consensus, con complica e problema por ta,' segun minister Thijsen.

Na final Minister Thijsen a bisa di ta convenci den e capacidad di e team di Arubahuis pa realisa e vision y plannan cu e tin como Minister Plenipotenciario. Tambe sr. Thijsen a gradici su famia cu ta e fundeshi pa e por ehecuta su function na Hulanda.



AÑA NOBO NO TA SOLAMENTE  
UN CAMBIO DEN KALENDER.  
E TA TAMBE UN RECORDATORIO  
PA ESTABLECE METANAN NOBO  
Y TRAHA RIBA NAN  
PA NAN BIRA REALIDAD.  
CU 2023 TUR CIUDADANO  
TRAHA PA E  
HARMONIA Y PAZ,  
EXITO Y PROSPERIDAD,  
CRECEMENTO Y DESAROYO  
DI NOS PAIS.

*Bon Pasco y  
Prospero  
Aña Nobo.*



Gabinete Wever - Croes II